

საქართველოს რეგიონული განვითარებისა და ინფრასტრუქტურის მინისტრის

ბრძანება №9/5

2009 წლის 14 აგვისტო

ქ. თბილისი

**საქართველოს რეგიონული განვითარებისა და ინფრასტრუქტურის სამინისტროს
გამგებლობაში არსებული სახელმწიფო საქვეუწყებო დაწესებულების – საქართველოს
საავტომობილო გზების დეპარტამენტის ტერიტორიული ორგანოს – აფხაზეთის ავტონომიური
რესპუბლიკის საავტომობილო გზების დირექციის დებულების დამტკიცების შესახებ**

„საქართველოს მთავრობის სტრუქტურის, უფლებამოსილებისა და საქმიანობის წესის შესახებ“
საქართველოს კანონის 26-ე მუხლის მე-4 პუნქტის შესაბამისად, ვბრძანებ:

1. დამტკიცდეს საქართველოს რეგიონული განვითარებისა და ინფრასტრუქტურის სამინისტროს
გამგებლობაში არსებული სახელმწიფო საქვეუწყებო დაწესებულების – საქართველოს საავტომობილო
გზების დეპარტამენტის ტერიტორიული ორგანოს – აფხაზეთის ავტონომიური რესპუბლიკის
საავტომობილო გზების დირექციის თანდართული დებულება (დანართი №1).

2. ბრძანება ამოქმედდეს გამოქვეყნებისთანავე.

დ. ტყეშელაშვილი

შეტანილი ცვლილებები:

1. საქართველოს რეგიონული განვითარებისა და ინფრასტრუქტურის მინისტრის 2013 წლის 27 მაისის ბრძანება
№6/5 - ვებგვერდი, 29.05.2013წ.

2. საქართველოს რეგიონული განვითარებისა და ინფრასტრუქტურის მინისტრის 2013 წლის 11 დეკემბრის
ბრძანება №12/5 - ვებგვერდი, 12.12.2013წ.

3. საქართველოს რეგიონული განვითარებისა და ინფრასტრუქტურის მინისტრის 2014 წლის 30 ოქტომბრის
ბრძანება №16/5 - ვებგვერდი, 31.10.2014წ.

**საქართველოს საავტომობილო გზების დეპარტამენტის ტერიტორიული ორგანოს –
აფხაზეთის ავტონომიური რესპუბლიკის საავტომობილო გზების დირექციის**

დებულება

მუხლი 1. ზოგადი დებულებები

1. აფხაზეთის ავტონომიური რესპუბლიკის საავტომობილო გზების დირექცია (შემდგომში –
დირექცია) არის საქართველოს რეგიონული განვითარებისა და ინფრასტრუქტურის სამინისტროს
(შემდგომში – სამინისტრო) გამგებლობაში არსებული სახელმწიფო საქვეუწყებო დაწესებულება –
საქართველოს საავტომობილო გზების დეპარტამენტის (შემდგომში – დეპარტამენტი) ტერიტორიული
ორგანო, რომელიც ახორციელებს ამ დებულებით გათვალისწინებულ უფლებამოსილებას.

2. დირექცია თავის საქმიანობას განახორციელებს საქართველოს კონსტიტუციის, „საქართველოს
მთავრობის სტრუქტურის, უფლებამოსილებისა და საქმიანობის წესის შესახებ“ საქართველოს კანონის,
„საავტომობილო გზების შესახებ“ საქართველოს კანონის, „საგზაო ფონდის შესახებ“ საქართველოს

კანონის, სამინისტროს დებულების, დეპარტამენტის დებულების ამ დებულებისა და საქართველოს კანონმდებლობით დადგენილი პრინციპების საფუძველზე.

3. დირექციის დაფინანსების ძირითადი წყაროა სახელმწიფო ბიუჯეტი; დირექციის ქონებას შეადგენს მის სარგებლობაში გადაცემული ძირითადი და საბრუნავი საშუალებები და დაფინანსო რესურსები. დირექციის ქონება და ბიუჯეტი წარმოადგენს დეპარტამენტის ქონებისა და ბიუჯეტის შემადგენელ ნაწილს.

4. დირექცია არის ტერიტორიული ორგანო და თავისი კომპეტენციის ფარგლებში წარმოადგენს დეპარტამენტს – შესაბამის ადმინისტრაციულ-ტერიტორიულ ერთეულში.

5. დირექციის ბალანსზე არსებული ქონება წარმოადგენს დეპარტამენტის ქონებას; დირექციას, საქართველოს კანონმდებლობით გათვალისწინებული მიზნებისა და დაკისრებული ფუნქციების განსახორციელებლად შეიძლება გადაეცეს სახელმწიფო ან მუნიციპალურ საკუთრებაში არსებული ქონება, საქართველოს კანონმდებლობით ქონების გადაცემისათვის დადგენილი წესით.

6. დირექციას აქვს საკუთარი ბეჭედი.

7. დირექციის იურიდიული მისამართია: საქართველო, ქ. თბილისი, ალ. ყაზბეგის გამზ. №12.

მუხლი 2. დირექციის საქმიანობის სფერო და ამოცანები

1. დირექცია, როგორც დეპარტამენტის წარმომადგენელი აფხაზეთის ავტონომიური რესპუბლიკის ადმინისტრაციულ-ტერიტორიულ ფარგლებში, დაკისრებული ფუნქციებისა და ამოცანების შესაბამისად უფლებამოსილია განახორციელოს:

ა) საავტომობილო გზების ქსელის სრულყოფა და განვითარება; საავტომობილო გზების ფუნქციონირების კონტროლი და ზედამხედველობა უშუალოდ ან საქართველოს კანონმდებლობით განსაზღვრული სხვა წესით;

ბ) საავტომობილო გზების სფეროში თავისი კომპეტენციის ფარგლებში იმ საერთაშორისო ხელშეკრულებებით ნაკისრი ვალდებულებების შესრულება, რომლის მონაწილეც არის საქართველო;

გ) დადგენილი წესით დამტკიცების შემდეგ, დეპარტამენტის მიერ შემუშავებული საავტომობილო გზების განვითარების პოლიტიკისა და სტრატეგიის რეალიზაცია;

დ) საქართველოს კანონმდებლობით განსაზღვრულ შემთხვევებში საავტომობილო გზების სფეროში დასაქმებულ პირთა საქმიანობის მართლზომიერების უზრუნველყოფა;

ე) ადამიანის სიცოცხლისა და ჯანმრთელობის უსაფრთხოების, გარემოსა და სახელმწიფო ინტერესების დაცვა;

ვ) თავისი კომპეტენციის ფარგლებში სხვადასხვა პროგრამების, ეროვნული სტანდარტების, სამშენებლო ნორმებისა და წესების შემუშავებაში მონაწილეობა;

ზ) საგანგებო სიტუაციებისა და სტიქიური მოვლენების მოსალოდნელი შედეგების ანალიზი, შეფასება და პროფილაქტიკურ ღონისძიებათა შემუშავება, მათი სალიკვიდაციო სამუშაოების კოორდინაცია საერთო სარგებლობის საავტომობილო გზებზე; ექსტრემალურ პირობებში საერთო სარგებლობის საავტომობილო გზებზე შეუფერხებელი მოძრაობის უზრუნველსაყოფად კონკრეტული და დაუყოვნებლივი ღონისძიებების შემუშავება და განხორციელება;

თ) დეპარტამენტის მიერ შემუშავებული საავტომობილო გზების სფეროს ეკონომიკური რეფორმის სახელმწიფო პროგრამის და ერთიანი სოციალურ-ეკონომიკური და სამეცნიერო-ტექნიკური პოლიტიკის განხორციელებისათვის ხელის შეწყობა;

ი) თავისი კომპეტენციის ფარგლებში სახელმწიფო პროგრამების რეალიზაციაში მონაწილეობის მიღება;

კ) გადაცემული სახელმწიფო და მუნიციპალური ქონების ფლობა და სარგებლობა;

ლ) საერთო სარგებლობის საავტომობილო გზების სფეროში კავშირგაბმულობისა და საინფორმაციო საქმიანობის ორგანიზაციისათვის ხელის შეწყობა, მიმდებარე ზოლში ინფრასტრუქტურის განვითარების რეგულირება და ამ მიმართებით არამართლზომიერ ქმედებათა აღმოფხვრა;

მ) ფასიანი საერთო სარგებლობის გზებზე მოსაკრებლებისა და საფასურის აკრეფის ორგანიზაციისა და ადმინისტრირებისათვის შესაბამისი პირობების შექმნა;

ნ) თავისი კომპეტენციის ფარგლებში საავტომობილო გზების სფეროში სახელმწიფოს მიერ აღებული კრედიტების, გრანტების, პროგრამებისა და სხვა დაფინანსებით მიღებული სახსრების რაციონალური გამოყენება, მათი ხარჯვის და რეალიზაციის მონიტორინგი; უცხოური ინვესტიციების მოსაზიდად დასაბუთებული წინადადებებისა და ორგანიზაციულ-ტექნიკური ღონისძიებების პროექტების მომზადება;

ო) პერიოდულად, არსებული წესის შესაბამისად, სახიდე გადასასვლელებისა და სხვა სპეციალური დანიშნულების საგზაო საინჟინრო ნაგებობების მდგომარეობის ვიზუალური დათვალიერება და დეპარტამენტში შესაბამისი ანგარიშის წარდგენა;

პ) გზებისა და მათი კუთვნილებების საექსპლუატაციო მდგომარეობის სისტემატური კონტროლი;

ჟ) საქართველოს კანონმდებლობით გათვალისწინებულ შემთხვევებში აფხაზეთის ავტონომიური რესპუბლიკის წარმომადგენლობითი და აღმასრულებელი ორგანოების წინადადებებისა და გადაწყვეტილებების რეალიზაცია;

რ) თანამშრომლობა შინაგან საქმეთა სამინისტროს აფხაზეთის ავტონომიური რესპუბლიკის შინაგან საქმეთა მთავარი სამმართველოს შესაბამის სამსახურებთან – საავტომობილო გზებზე უსაფრთხო და შეუფერხებელი მოძრაობის უზრუნველსაყოფად.

2. დირექცია, როგორც ტერიტორიული ორგანო, წარმოადგენს დეპარტამენტს შესაბამის ადმინისტრაციულ-ტერიტორიულ ერთეულში და მის კომპეტენციას მიკუთვნებულ საკითხებზე, დეპარტამენტის სახელით იძენს უფლებებსა და მოვალეობებს, შეუძლია სასამართლოში გამოვიდეს მოსარჩელედ და მოპასუხედ.

მუხლი 3. დირექციის ანგარიშვალდებულება

1. დირექცია ანგარიშვალდებულია დეპარტამენტის წინაშე.

2. დეპარტამენტის თავმჯდომარე უფლებამოსილია გააუქმოს დირექციის არამართლზომიერი აქტები და მოქმედებები მათი მიზანშეუწონლობის მოტივით.

3. დირექცია ვალდებულია უზრუნველყოს დეპარტამენტის ინფორმირება მის გამგებლობის სფეროში მიმდინარე საქმიანობის შესახებ.

4. დირექცია ვალდებულია მიაწოდოს დეპარტამენტს ინფორმაცია საბიუჯეტო სახსრების მიზნობრივი ხარჯვის შესახებ.

მუხლი 4. დირექციის ხელმძღვანელობა

1. დირექციას ხელმძღვანელობს დირექტორი, რომელსაც საქართველოს საავტომობილო გზების დეპარტამენტის თავმჯდომარის წარდგინებით თანამდებობაზე ნიშნავს და თანამდებობიდან ათავისუფლებს საქართველოს რეგიონული განვითარებისა და ინფრასტრუქტურის მინისტრი.

2. დირექტორი უძღვება დირექციის საქმიანობას, არის მისი წარმომადგენელი და პასუხისმგებელია საქმიანობის სწორად წარმართვაზე, მის მფლობელობაში არსებულ ქონებაზე და მის გამოყენებაზე, აგრეთვე საბიუჯეტო და სხვა ფულადი სახსრების მიზნობრივად და სწორად ხარჯვაზე.

3. დირექტორი მხოლოდ ორგანიზაციული საკითხების უზრუნველსაყოფად გამოსცემს ინდივიდუალურ ადმინისტრაციულ-სამართლებრივ აქტს.

4. დირექტორი უზრუნველყოფს ამ დებულებით გათვალისწინებულ დირექციის ფუნქციების განხორციელებას და წარმოადგენს დირექციას მესამე პირებთან ურთიერთობაში.

5. (ამოღებულია - 27.05.2013, №6/5).

6. (ამოღებულია - 30.10.2014, №16/5).

7. დირექციის სამტატო ნუსხასა და ხარჯთაღრიცხვას ამტკიცებს საქართველოს საავტომობილო გზების დეპარტამენტის თავმჯდომარე, სახელმწიფო ბიუჯეტით განსაზღვრული ასიგნებების ფარგლებში.

საქართველოს რეგიონული განვითარებისა და ინფრასტრუქტურის მინისტრის 2013 წლის 27 მაისის ბრძანება №6/ნ - ვებგვერდი, 29.05.2013წ.

საქართველოს რეგიონული განვითარებისა და ინფრასტრუქტურის მინისტრის 2014 წლის 30 ოქტომბრის ბრძანება №16/ნ - ვებგვერდი, 31.10.2014წ.

მუხლი 5. ამოღებულია

საქართველოს რეგიონული განვითარებისა და ინფრასტრუქტურის მინისტრის 2013 წლის 11 დეკემბრის ბრძანება №12/ნ - ვებგვერდი, 12.12.2013წ.

საქართველოს რეგიონული განვითარებისა და ინფრასტრუქტურის მინისტრის 2014 წლის 30 ოქტომბრის ბრძანება №16/ნ - ვებგვერდი, 31.10.2014წ.

მუხლი 6. ლიკვიდაცია და რეორგანიზაცია

დირექციის ლიკვიდაცია და რეორგანიზაცია ხდება საქართველოს კანონმდებლობით დადგენილი წესით.